


Araling Panlipunan

Unang Markahan – Modyul 1: Ang Epekto ng Kaisipang Liberal sa Pag-usbong ng Damdaming Nasyonalismo



Araling Panlipunan – Ikaanim na Baitang

Alternative Delivery Mode

Unang Markahan – Modyul 1: Ang Epekto ng Kaisipang Liberal sa Pag-usbong ng Damdaming Nasyonalismo

Unang Edisyon, 2020

Isinasaad sa Batas Republika 8293, Seksiyon 176 na: Hindi maaaring magkaroon ng karapatang-sipi sa anomang akda ang Pamahalaan ng Pilipinas. Gayonpaman, kailangan muna ang pahintulot ng ahensiya o tanggapan ng pamahalaan na naghanda ng akda kung ito ay pagkakakitaan. Kabilang sa mga maaaring gawin ng nasabing ahensiya o tanggapan ay ang pagtakda ng kaukulang bayad.

Ang mga akda (kuwento, seleksiyon, tula, awit, larawan, ngalan ng produkto o brand name, tatak o trademark, palabas sa telebisyon, pelikula, atbp.) na ginamit sa modyul na ito ay nagtataglay ng karapatang-ari ng mga iyon. Pinagsumikapang matunton ang mga ito upang makuha ang pahintulot sa paggamit ng materyales. Hindi inaangkin ng mga tagapaglathala at mga may-akda ang karapatang-aring iyon. Ang anomang gamit maliban sa modyul na ito ay kinakailangan ng pahintulot mula sa mga orihinal na may-akda ng mga ito.

Walang anomang parte ng materyales na ito ang maaaring kopyahin o ilimbag sa anomang paraan nang walang pahintulot sa Kagawaran.

Inilathala ng Kagawaran ng Edukasyon

Kalihim: Leonor Magtolis Briones

Pangalawang Kalihim: Diosdado M. San Antonio

Bumuo sa Pagsusulat ng Modyul

Manunulat:	Carmela M. De Gracia, Mitzel M. Alvaran	
Editor:	Alma J. Gascon, Jewelyn Q. Cadigal, Venetia Anne A. Tropa, Blas P. Tabayag, Jr.	
Tagasuri:	Blas P. Tabayag, Jr., Mary Helen M. Bocol, Junry M. Esparar	
Tagaguhit:	Krisha Marie T. Paltu-ob, Nancy H. Molde, Roland B. Tarrazona	
Tagalapat:	Jewelyn Q. Cadigal	
Tagapamahala:	Ramir B. Uytico	Pedro T. Escobarte, Jr.
	Portia M. Mallorca	Nelly E. Garrote
	Elena P. Gonzaga	Donald T. Genine
	Celestino S. Dalumpines IV	Junry M. Esparar
	Mary Helen M. Bocol	Blas P. Tabayag, Jr.
	Jewelyn Q. Cadigal	Emee Ann P. Valdez

Inilimbag sa Pilipinas ng _____

Department of Education – Region VI

Office Address: Duran Street, Iloilo City
Telefax: (033) 336-2816, (033) 509-7653
E-mail Address: region6@deped.gov.ph

Araling Panlipunan

Unang Markahan – Modyul 1:

Ang Epekto ng Kaisipang Liberal

sa Pag-usbong ng Damdaming

Nasyonalismo

Paunang Salita

Ang Self-Learning Module o SLM na ito ay maingat na inihanda para sa ating mag-aaral sa kanilang pag-aaral sa tahanan. Binubuo ito ng iba't ibang bahagi na gagabay sa kanila upang maunawaan ang bawat aralin at malinang ang mga kasanayang itinakda ng kurikulum.

Ang modyul na ito ay may inilaang Gabay sa Guro/Tagapagdaloy na naglalaman ng mga paalala, pantulong o estratehiyang magagamit ng mga magulang o kung sinumang gagabay at tutulong sa pag-aaral ng mga mag-aaral sa kani-kanilang tahanan.

Ito ay may kalakip na paunang pagsusulit upang masukat ang nalalaman ng mag-aaral na may kinalaman sa inihandang aralin. Ito ang magsasabi kung kailangan niya ng ibayong tulong mula sa tagapagdaloy o sa guro. Mayroon ding pagsusulit sa bawat pagtatapos ng aralin upang masukat naman ang natutuhan. May susi ng pagwawasto upang makita kung tama o mali ang mga sagot sa bawat gawain at pagsusulit. Inaasahan naming na magiging matapat ang bawat isa sa paggamit nito.

Pinapaalalahanan din ang mga mag-aaral na ingatan ng SLM na ito upang magamit pa ng ibang mangangailangan. Huwag susulatan o mamarkahan ang anumang bahagi ng modyul. Gumamit lamang ng hiwalay na papel sa pagsagot sa mga pagsasanay.

Hinihikayat ang mga mag-aaral na makipag-ugnayan agad sa kanilang guro kung sila ay makararanas ng suliranin sa pag-unawa sa mga aralin at paggamit ng SLM na ito.

Sa pamamagitan ng modyul na ito at sa tulong ng ating mga tagapagdaloy, umaasa kami na matututo an gating mag-aaral kahit wala sila sa paaralan.



Alamin

Naranasan mo na bang magtiis? Magtimpi at masaknan? Sadyang likas sa ating mga Pilipino ang mapagmatiis at mapagbigay kung kaya't matagal tayong nagtiis sa kamay ng mga mapang-abuso at malulupit na mga Español. Subalit dumating ang sandali na kung saan nagising ang ating mga bayani sa katotohanan. Tulad ng wika ni Gat Jose Rizal, "Walang mang-aalipin, kung walang paaalipin."

Sa modyul na ito ay iyong malalaman mo kung paano nakaapekto ang kaisipang liberal sa pagsibol ng damdaming makabansa na nakapagpausbong ng nasyonalismong Pilipino.

May dalawang aralin sa modyul na ito:

- Aralin 1- Pag-usbong ng Kamalayang Nasyonalismo
- Aralin 2- Epekto ng Kaisipang Liberal Sa Pilipinas

Pagkatapos mong gawin ang mga aralin sa modyul na ito ay inaasahang magagawa mo ang sumusunod na kasanayan:

1. natatalakay ang pagdating ng kaisipang liberal sa bansa;
2. naipaliliwanag ang mga pangyayaring nagbigay daan sa paglinang ng damdaming nasyonalismo;
3. nasusuri ang mga epekto ng kaisipang liberal sa pag-usbong ng damdaming nasyonalismo; at
4. napahalagahan ang pagpupunyagi ng mga Pilipino na isulong ang kalayaan ay pagsasarili ng bansa.



Subukin

Bago tayo magsimula sa ating bagong aralin, subukan mo munang sagutan ang katanungan sa ibaba.

Panuto: Suriin at unawaing mabuti ang bawat pangungusap. Isulat sa sagutang-papel ang letra ng tamang sagot.

1. Bakit mahalaga ang pagbukas ng Suez Canal?
 - A. Dahil naging matagal ang paglalakbay mula Maynila patungong Spain
 - B. Dahil nakarating sa atin ang kaisipang liberal
 - C. Dahil naging mahal ang bilihin
 - D. Dahil naging mayaman ang Pilipinas
2. Kailan naganap ang pag-alsa sa Cavite?
 - A. 17 Nobyembre 1869
 - B. 20 Enero 1872
 - C. 17 Pebrero 1872
 - D. 19 Setyembre 1868
3. Alin ang hindi naging salik sa pag-usbong ng nasyonalismong Pilipino?
 - A. Pagbukas ng Suez Canal
 - B. Pagdating ng liberal na kaisipan sa Pilipinas
 - C. Pagbayad ng buwis
 - D. Pag-alsa sa Cavite
4. Ano ang tawag sa paglagay ng mga Paring Sekular sa mga parokya?
 - A. Regular
 - B. Sekularisasyon
 - C. GOMBURZA
 - D. Principalia
5. Ano ang tawag sa mga paring hindi nabibilang sa anumang samahang relihiyoso?
 - A. Regular
 - B. Sekular
 - C. Ilustrados
 - D. GOMBURZA
6. Sino ang namuno sa kilusang itinatag ng mga Paring Pilipino?
 - A. Mariano Gomez
 - B. Jose Burgos
 - C. Jacinto Zamora
 - D. Pedro Pelaez
7. Kailan binitay ang GOMBURZA?
 - A. 17 Nobyembre 1869
 - B. 20 Enero 1872
 - C. 17 Pebrero 1872
 - D. 19 Setyembre 1868
8. Sino ang namuno sa pag-alsa sa Cavite?
 - A. Mariano Gomez
 - B. Pedro Pelaez
 - C. Fernando La Madrid
 - D. Jose Burgos

9. Anong samahan ang itinatag ng mga Pilipinong kabataan na naliwanagan o tinatawag na ilustrados?
- A. Kilusang Propaganda
 - B. Katipunan
 - C. Sekularisasyon
 - D. Panggitnang-uri
10. Kailan nabuksan ang Suez Canal?
- A. 17 Nobyembre 1869
 - B. 17 Pebrero 1872
 - C. 20 Enero 1872
 - D. 19 Setyembre 1868
11. Saan nabibilang ang mga mayayamang Pilipino, mga mestisong Español, at Tsino?
- A. Ilustrado
 - B. regular
 - C. Propagandista
 - D. Panggitnang uri
12. Ano ang naging bunga ng pagkakaroon ng pandaigdigang kalakalan?
- A. Maraming mga Pilipino ang umunlad ang pamumuhay.
 - B. Nagkaroon ng pagbabago sa pamahalaan.
 - C. Maraming Pilipino ang naghirap.
 - D. Naging malupit ang mga Español
13. Anong pahayagan ang itinatag ni Graciano Lopez Jaena?
- A. Diaryong Tagalog
 - B. La Solidaridad
 - C. Kalayaan
 - D. Katipunan
14. Ano ang tawag sa mga anak ng mayayamang Pilipino na nakapag-aral at naging propesyonal?
- A. Middle Class
 - B. Mestiso
 - C. Tsino
 - D. Ilustrado
15. Ano ang tawag sa panahon ng pag-usbong ng liberal na ideya ng Pilipino?
- A. Panahon ng Kalayaan
 - B. Panahon ng Katapangan
 - C. Panahon ng Kaliwanagan
 - D. Panahon ng Kapayapaan

Aralin**1****Pag-usbong ng Kamalayang Nasyonalismo**

Nasyonalismo, ano nga ba ang ibig sabihin nito? Paano nga ba nagising ang kamalayan ng mga Pilipino sa tinatawag na nasyonalismo? Sino kaya ang nag-udyok sa kanila? Ano nga ba ang mga panyayaring naganap kung bakit naghangad sila ng tinatawag na kalayaan, pagkapantay-pantay, at kapatiran? May kinalaman kaya ang pagbukas ng tinatawag na Suez Canal? Pagpasok ng kaisipang liberal sa bansa? O kaya dahil sa pamamahala ni Gob. Hen. Carlos Maria de la Torre? Kaya ang mga Pilipino ay unti-unting nabuksan ang isipan sa katotohana na hindi sila dapat maging bilanggo sa sariling bansa at nagkaroon ng lakas na maging malaya.

Tatalakayin sa araling ito kung ano ang nagbigay-lakas upang magkaisa ang mga naaaping Pilipino upang maging malaya sa mga mabagsik na kamay ng mga Kastila. Handa ka na ba?


Pagkatapos ng aralin, inaasahang malilinang ang sumusunod mong kasanayan:

1. natatalakay ang pagdating ng kaisipang liberal sa bansa;
2. naipaliliwanag ang mga pangyayaring nagbigay daan sa paglinang ng damdaming nasyonalismo;
3. naiintindihan ang kahulugan ng liberal na ideya tungo sa pag-usbong ng damdaming nasyonalismo; at
4. napahalagahan ang pagpupunyagi ng mga Pilipino na isulong ang kalayaan ay pagsasarili ng bansa.



Balikan

Panuto: Kunin ang iyong sanayang papel. Katulad ng nakikita mo sa ibaba kulayan mo diyan ang sasakyang Galyon at sa loob ng kahon sa ibaba ng larawan ay isulat kung saan ito ginagamit ng mga unang Pilipino.



Gamit ng Galyon




Tuklasin

Bago ka pumunta sa iyong aralin, suriin mo ang mga larawan sa ibaba. Isulat ang mga letra ng mga larawan na may kinalaman sa pag-usbong ng damdaming nasyonalismo ng mga Pilipino.


- A. Ang tatlong paring martir:
Mariano Gomez, Jose Burgos,
at Jacinto Zamora




- B. Suez Canal 1869




- C. Pag-alsa sa Cavite 1872



- D. Basi Revolt Monument



- E. Ang liberal na si Carlos
Maria dela Torre





Suriin

Mga Salik na Nakapagpausbong ng Damdaming Nasyonalismo

Ang damdaming nasyonalismo ay ang pagkakaroon ng iisang adhikain para sa Inang Bayan na mapabuti ito. Ano ano ang salik na nagbunsod sa mga Pilipino upang isulong ang adhikaing ito?

Pagbubukas ng Pilipinas sa Pandaigdigang Kalakalan

Noong 1789, sa pamamagitan ng isang dekreto, bahagyang nabuksan ang Maynila sa pandaigdigang kalakalan, kaya't nagkaroon ng pagkakataon ang mga dayuhan na makapagnegosyo sa Pilipinas.

Dumami pa lalo ang mga mangangalakal sa Maynila nang mabuksan ang Suez Canal noong 17 Nobyembre 1869. Ang Suez Canal ay matatagpuan sa Egypt, pinag-uugnay nito ang Mediterranean Sea at Red Sea. Sa pagbukas nito naging madali ang pagpasok ng mga kalakal at pagdating ng kaisipang liberal mula sa Europe patungo sa ibang panig ng daigdig. Naging maikli sa isang buwang ang paglalakbay mula Maynila patungong Spain. Napabilis din ang paghahatid ng mga impormasyon na galing sa Europa. Maraming Pilipino rin ang nakarating sa Spain at sa ibang bansa sa Europa upang mag-aral at maglakbay.

Sa pagpunta ng mga Pilipino sa ibang bansa ay natuto silang makisalamuha sa ibang dayuhan. Ito ay naging daan upang mamulat sila sa mga bagong ideya. Ganoon din ang mga dayuhan, napadali sa kanila na makarating sa Pilipinas dala ang kani-kanilang sariling kultura, pananaw, at kaisipan. Naging maluwag din ang pagpasok ng ideyang liberal nina John Locke, Jean Jacques Rousseau, Voltaire, Montesquieu, at iba pang Europeong pilosopo sa bansa.

Nakarating din sa Pilipinas ang mga aklat, pahayagan, at iba pang babasahing mula sa Estados Unidos at Europa. Natutuhan ng mga Pilipino mula sa mga aklat at magasin ang tungkol sa pagsisikap ng mga Amerikano at Pranses na matamo ang kalayaan. Ang mga aklat na ito ang nagbigay sa mga Pilipino ng bagong kaisipang politikal at mga mithiin ng mga Rebolusyong Pranses at Amerikano, na siyang nagmulat sa mga Pilipino sa tinatawag na kalayaan, pagkakapantay-pantay, at pagkakapatiran.

Pagpasok ng Kaisipang Liberal sa Pilipinas

Unang ginamit ang katagang “liberal” sa Spain at tumutukoy ito sa mga rebeldeng Español noong 1820. Bagamat ang tunay na kahulugan nito ay ang kalayaang isulong ang pagbabago sa lipunan.

Ang kaisipang liberal ay nakarating sa ating bansa nang buksan ang Pilipinas sa pandaigdigang pangangalakal noong 1834 hanggang 1873. Malaki ang naiambag ng pagbukas ng Suez Canal sa paglaganap ng liberalismo. Dahil sa naging mabilis ang pagdating ng mga kalakal at naging maunlad ang pamumuhay ng ibang magsasaka at mangangalakal, marami sa kanilang mga anak ang nakapag-aral sa Maynila o sa Spain. Ganoon din ang pagdating ng mga dayuhan sa bansa at may naiiwang mga bagong ideya na siyang nagbigay daan upang lumaganap ang impluwensiyang “La Ilustracion” (Enlightenment) o pagkamulat.

Namulat ang mga Pilipino sa tunay na kalagaan ng mga malayang bansa. Nakita nila at naranasan kung paano mamuhay sa isang malayang kapaligiran. Napaghambing nila ang pamamahala ng mga Español sa ibang bansa sa Europa. Napag-alaman nila na may karapatan silang dapat ipaglaban at hindi sila dapat maging alipin ng mga dayuhan sa sariling lupa.

Pag-usbong ng Panggitnang Uri

Sa pagsigla ng kalakalan sa Maynila, maraming mga Pilipino at mga dayuhan ang naganyak na makipagkalakalan. Ang mga Ingles, Amerikano, at Tsino ay nakapagpasok ng malaking kapital sa bansa. Nagbigay daan ito sa pag-unlad ng pamumuhay ng mga Pilipino. Sila ang bumuo sa panggitnang uri (Middle Class) sa lipunan sa Pilipinas. Ang panggitnang uri ay binubuo ng mayayamang Pilipino, mestizong Español, at Tsino na ang kabuhayan ay higit pa sa karaniwang Pilipino.

Dahil sa kasaganahan na nakamit nila marami sa mga anak nila ang nakapag-aral sa Maynila o sa Europa. Dahil sa kanilang pagsasanay sa ibang bansa naging malawak ang kanilang pananaw sa buhay. Doon, ang mga kabataang naliwanagan o nabuksan ang kamalayan tungkol sa mga ideya o kaisipang liberal ay tinawag na ilustrados. Ang mga ilustrados tulad nina Jose Rizal, Graciano Lopez Jaena, Marcelo H. del Pilar, Antonio Luna, Juan Luna, Mariano Ponce, Jose Maria Panganiban, at marami pang iba. Ang kaisipang liberal na kanilang nabasa at sa edukasyong kanilang nakamit ang siyang nagmulat sa kanila sa tunay na kalagayan ng Pilipinas.

Pamumuno ni Gobernador Heneral Carlos Maria de la Torre

Sumiklab ang labanan sa Spain noong 19 ng Setyembre 1868. Ang himagsikan bunga ng pagpalit ng pamamahala mula sa kamay ng mga konserbatibo tungo sa mga liberal. Sa panahong iyon ipinadala sa Pilipinas si Gobernador Heneral Carlos Maria de la Torre.

Isang magiting na kawal si Heneral Carlos Maria de la Torre, naging gobernador heneral noong 23 Hunyo 1869. Naniniwala siya sa liberalismo at ipinamalas niya ito sa pamamagitan ng mga patakaran at mahusay na pakikitungo sa mga tao. Pantay-pantay ang pagtingin niya sa mga Español at mga Pilipino.

Ipinagbawal niya ang parusang paghahagupit; winakasan ang pag-eespiya sa mga pahayagan; at hinikayat ang malayang pamamahayag. Naniniwala siya na ang lahat ng tao ay pantay-pantay. Kaya sa panahong ng kaniyang panunungkulan ay naramdaman ng mga Pilipino ang Kalayaan at ang malaking pagbabago.

Maikli lamang ang pamumuno ni Gobernador Heneral Carlos Maria de la Torre ngunit napakilala niya ang kalayaan, pagkapantay-pantay, at kapatiran.

Ang Pag-aalsa sa Cavite noong 1872 at ang Pagbitay sa Tatlong Paring Martir

Nang matapos ang panahon sa pamumuno ni Gobernador Heneral Carlos Maria de la Torre, ang pumalit sa kanya ay si Heneral Rafael Izquierdo. Kalaban siya ng mga liberal sa pamahalaan.

Si Izquierdo ay kabaliktaran sa paraan ng pamumuno ni de la Torre. Ipinagmalaki ni Izquierdo ang kaniyang pamamaraan sa pamamahala. Ito ang paggamit ng krus sa isang kamay at espada sa isang kamay. Ang pamamahala ni Goberdor Izquierdo naging mahigpit at nagdulot ng pahirap sa mga Pilipino ang kaniyang mga kautusan. Inalisan niya ng karapatan at kabuhayan ang mga manggagawang Pilipino sa Cavite na hindi nakapagbayad ng taunang buwis.

Sa ginawa ni Izquierdo na pagmamalupit naramdaman ng mga Pilipino ang malaking pagkaiba ng pamumuno ni dela Torre. Dahil dito nagkaroon ng di pagkakaunawaan at nauwi sa pag-alsa noong 20 Enero 1872, sa pamumuno ni Sarhento Fernando La Madrid. Napatay nila ang mga pinuno ng hukbong Español at nakuha ang arsenal sa Cavite. Lumusob ang malaking tropa ng mga Español at nagkaroon ng madugong labanan, na siyang ikinasawi ng mga nag-alsang Caviteño kasama na si La Madrid. Ang mga nakaligtas ay ipinadala sa Intramuros, Maynila bilang mga bilanggo.


Nasugpo kaagad ng mga Español ang pag-alsa sa Cavite, hinuli lahat na nasangkot at pinagbintangang pinuno nito, kabilang sina Padre Mariano Gomez, Padre Jose Burgos, at Padre Jacinto Zamora. Pinagbintangan sila na mga pinuno sa pag-alsa sa Cavite upang matahimik ang noon mainit na isyu ng sekularisasyon.

Ang Kilusang Sekularisasyon ay itinatag upang ipagtanggol ang karapatan ng mga paring sekular sa mga parokya. May dalawang uri ng pari noon ang regular at sekular. Ang regular ito ang mga paring kasama sa mga samahang relihiyoso at sekular ang hindi kasama. Pinamumunuan ni Padre Pedro Pelaez ang Kilusang Sekularisasyon.

Noong 3 Hunyo 1863 binawian ng buhay si Padre Pelaez. Ang pumalit sa kanya sa pamumuno ay si Padre Jose Burgos na kilala bilang pinakamagaling na mag-aaral ni Padre Pelaez, kasama sina Padre Mariano Gomez at Padre Jacinto Zamora (GomBurZa)

Pinadakip at hinatulan sila ni Gobernador Izquierdo ng kamatayan sa pamamagitan ng garote noong 17 Pebrero 1872. Ngunit naniniwala si Arsobispo Gregorio Meliton Martinez na walang kasalanan ang tatlong pari. Kaya hindi niya pinaalis ang abito nang binitay ang mga ito sa Bagumbayan (Rizal Park na ngayon).

Nagalit ang mga Pilipino sapagkat hindi totoo ang bintang sa tatlong paring martir at dahil dito ganap na napukaw ang kanilang damdaming nasyonalismo.



Pagyamanin

Ngayon alam mo na ang mga salik ng pag-usbong ng damdaming nasyonalismo ng mga Pilipino. Handa ka na bang pagyamanin ang kaalamang ito? Subukin mong sagutin ang sumusunod na gawain.

Gawain 1

Panuto: Basahin at suriing mabuti ang mga pangungusap at piliin sa loob ng panaklong ang tamang sagot. Isulat ito sa inyong sagutang-papel.

1. Ano ang pinakamahalagang pangyayari na nagpaigting sa galit ng mga Pilipino sa mga Español?
A. Pagbukas ng Suez Canal
B. Pagbitay sa tatlong paring martir
2. Ano ang tawag sa kaisipang galing sa Europa na nagpapakita ng kalayaan sa pagpapahayag ng damdamin at kaisipan?
A. Kaisipang Liberal
B. Enlightenment
3. Ano ang tawag kina Jose Burgos, Mariano Gomez, at Jacinto Zamora?
A. Ilustrados
B. Ang tatlong paring martir
4. Paano natin maipapakita ang damdaming nasyonalismo?
A. Pakikiisa at pagtataguyod ng mga pagbabago sa lipunan
B. Pag-alis sa bansa sa panahon ng krisis
5. Alin ang salik na nagpa-usbong sa damdaming nasyonalismo ng mga Pilipino?
A. Pagpasok ng kaisipang liberal
B. Pag-alis ng parusang paghahagupit

Gawain 2

Panuto: Punan ng wastong letra ang bawat kahon upang mabuo ang salitang tinutukoy. Isulat sa sagutang-papel ang buong salita.

1. Ano ang tawag sa Enlightenment o naliwanagan sa Spain?

L			L		S				C			N
---	--	--	---	--	---	--	--	--	---	--	--	---

2. Anong uri ng pamumuno ang pina-iral ni Carlos Maria de la Torre?

		B				L
--	--	---	--	--	--	---

3. Ilang buwan na lamang ang paglalakbay mula Maynila patungong Spain matapos mabuksan ang Suez Canal?

	S	
--	---	--

4. Sino ang pumalit kay Gobernador Heneral Carlos Maria de la Torre?

		F			L		d	e
	Z	Q		I		R		O

5. Sa anong paraan pinatay ang tatlong paring martir?

G					
---	--	--	--	--	--



Isaisip

Panuto: Sagutin ang mga tanong sa ibaba. Isulat sa sagutang-papel ang iyong sagot.


1. Ano ano ang mga salik sa pag-usbong ng damdaming nasyonalismong Pilipino?

2. Makatarungan ba ang ginawang pagbitay kina Padre Gomez, Burgos, at Zamora? Bakit?
3. Ang pagbitay sa tatlong paring martir ay nagpasidhi ng damdaming _____ ng mga Pilipino.




Isagawa

- A. Ano anong salita ang maiuugnay sa salitang “malayang kaisipan.” Isulat ang iyong mga sagot sa loob ng bilog (isa bawat bilog). Gawin ito sa iyong kuwaderno.



- B. Bilang kabataang Pilipino, paano mo maipakita ang iyong damdaming nasyonalismo? Isulat ang iyong sagot sa loob ng puso.





Tayahin

A. **Tama o Mali.** Isulat ang **Tama** kung ang ipinahahayag sa pangungusap ay wasto. Kung mali, palitan ang salitang nasalungguhitan upang maging wasto ang pangungusap. Isulat ang sagot sa sagutang-papel.

1. Si Pedro Pelaez ang namuno sa pag-alsa sa arsenal Cavite.
2. Hinatulan ng kamatayan ang tatlong paring martir sa pamamagitan ng garote sa Cavite, noong 17 Pebrero 1972.
3. Ang Suez Canal ang nagdurugtong sa Mediterranean Sea at Red Sea.
4. Ang dalawang pangkat ng mga pari noon ay regular at sekularisasyon.
5. Ang nasyonalismo ay ang pagkaroon ng kalayaan sa pagpapahayag ng damdamin at kaisipan.

B. Basahin at unawaing mabuti ang mga pahayag. Isulat ang sagot sa sagutang-papel.

1. Siya si _____, ang naniniwala sa liberal na paraan ng pamumuno.
2. Bakit nag-alsa ang mga sundalo sa arsenal sa Cavite noong 1872? Magbigay ng isang dahilan.
3. Anong kaisipan ang dala ng mga babasahin mula sa Europe?
4. Ano ang naramdaman ng mga Pilipino nang patayin sina Padre Gomez, Burgos, at Zamora?
5. Ano ano ang mga nalaman ng mga Pilipino nang pumasok sa Pilipinas ang kaisipang liberal? Magbigay ng dalawa.



Karagdagang Gawain

Panuto: Isulat ang tsek (✓) sa sagutang-papel kung ang pahayag ay salik na nakapagpausbong ng damdaming nasyonalismo ng mga Pilipino. Lagyan ng ekis (X) kung hindi.

- _____ 1. Republika ng Biak na Bato
- _____ 2. Pagpagawa ng mga daan
- _____ 3. Kaisipang liberal sa Pilipinas
- _____ 4. Pagtatatag ng ibat ibang parokya
- _____ 5. Saligang Batas ng Malolos
- _____ 6. Si Gobernador Carlos Maria de la Torre
- _____ 7. Pagbubukas ng Suez Canal
- _____ 8. Pag-aalsa sa Cavite noong 1872
- _____ 9. Pagtipon ng mga ginto at pilak
- _____ 10. Pagbitay sa Tatlong Paring Martir

Aralin

2

Epekto ng Kaisipang Liberal Sa Pilipinas

Kumusta na? Natapos mong mapag-aralan ang mga salik ng pag-usbong ng damdaming nasyonalismo ng mga Pilipino. Ano ang iyong naramdaman? Nagkaroon rin ba ng epekto sa iyo? Marami ang naging salik upang mapukaw ang damdaming nasyonalismo ng mga Pilipino. Ang bunga at epekto ng mga patakarang kolonyal sa Pilipinas, ang matagal na panahon ng pananakop, at pang-aapi at katiwalian ng mga pinunong Español ang unti-unting nagbuklod sa isipan at puso ng mga Pilipino upang malinang ang damdaming makabansa.

Ngayon sa aralin na ito ating pag-aaralan kung ano ang naging epekto ng kaisipang liberal sa Pilipinas.

Pagkatapos ng araling ito, inaasahang magagawa mo ang sumusunod:

1. nasusuri ang mga epekto ng kaisipang liberal sa pag-usbong ng damdaming nasyonalismo; at
2. napahalagahan ang pagpupunyagi ng mga Pilipino na isulong ang kalayaan ay pagsasarili ng bansa.



Balikan

Napag-aralan natin sa nakaraang aralin ang tungkol sa mga salik ng pag-usbong ng damdaming nasyonalismo. Natatandaan mo pa kaya ito?

Panuto: Sagutin ang BLOCKBUSTER. Isulat ang sagot sa sagutang-papel.

- | | | |
|---|-------|--|
| M | _____ | 1. Sinong M ang naniniwala na walang kasalanan ang tatlong paring martir? |
| C | _____ | 2. Sinong C ang gobernador na naging pantay ang pagtingin sa mga Pilipino at Español? |
| S | _____ | 3. Anong S ang tawag sa daraanan ng mga barkong pandagat sa Ehipto na binuksan para sa mabilis na kalakalan? |
| I | _____ | 4. Sinong I ang nag-utos na hulihin at bitayin ang GomBurZa? |
| L | _____ | 5. Anong L na kaisipan ang pumasok sa Pilipinas na gumising sa damdaming nasyonalismo ng mga Pilipino? |



Tuklasin

- A. Awitin ng buong puso ang popular na kundiman na “Bayan Ko”. Pagkatapos mong awitin ito, sagutin ang ilang katanungan sa ibaba.

Bayan Ko

Ang bayan kong Pilipinas,
Lupain ng ginto’t bulaklak.
Pag-ibig ang sa kaniyang palad
Nag-alay ng ganda’t dilag.

At sa kaniyang yumi at ganda,
Dayuhan ay nahalina.
Bayan ko, binihag ka,
Nasadlak sa dusa.

Ibon mang may layang lumipad,
kulungin mo at umiiyak!
Bayan pa kayang sakdal dilag,
Ang ‘di magnasang makaalpas?
Pilipinas kong minumutya,
Pugad ng luha ko’t dalita,
Aking adhika,
Makita kang sakdal laya!

Source: Jose Corazon de Jesus, *Bayan Ko*

Sagutin:

1. Ano ang nais iparating ng awiting Bayan Ko?
 2. Paano mo maipapakita ang iyong pagkamakabayan bilang isang bata?
- B. Subukan mong ilarawan ang sumusunod na bayani natin ayon sa iyong pagkakakilala sa kanila. Isulat ang iyong sagot sa sagutang-papel.

Mga Bayani:

- a. Graciano Lopez Jaena
- b. Jose Rizal
- c. Andres Bonifacio
- d. Marcelo H. Del Pilar



Suriin

Ang malaking pagkakamaling ginawa ni Gobernador Izquierdo ay ang hatulan niya ng kamatayan ang tatlong pari na sina Padre Mariano Gomez, Jose Burgos, at Jacinto Zamora. Iniutos ni Arsobispo Gregorio Meliton Martinez na patunugin ang mga kampana sa lahat ng simbahan. Ang pagkamatay ng tatlong pari ay itinuturing na kabayanihan ng mga Pilipino. Ang pangyayaring ito ay isa sa gumising sa damdaming nasyonalismo ng mga Pilipino. Nadama ng bayan na kailangan na ang pagbabago, dahil sa patuloy na kalupitan at katiwalian ng mga Español, ito ang nagbunsod sa mga Pilipino sa Espanya upang ilunsad ang Kilusang Propaganda.

Epekto ng Kaisipang Liberal sa Pilipinas

Ang Kilusang Propaganda

Noong 1872 matapos mabitay ang tatlong paring martir ay itinatag ang Kilusang Propaganda. Ang samahang ito ay gumamit ng mapayapang pamamaraan sa pamamagitan ng lapis, pluma, papel, at karunungan upang maipaabot ang kanilang paghingi ng reporma o pagbabago sa kolonya.

Ang Kilusang Propaganda ay isang samahang binuo ng ilang ilustrados upang humingi ng reporma sa mapayapang paraan. Hindi radikal o mapanghimagsik ang kahilingan ng mga propagandista. Ang mga kasapi nito ay sina Jose Rizal, Marcelo H. del Pilar, Graciano Lopez-Jaena, Antonio Luna, Juan Luna, Mariano Ponce, Trinidad Hermenegildo Pardo de Tavera, Jose Maria Panganiban, Pedro Paterno, Felix Resurreccion Hidalgo, at Dominador Gomez. Kabilang sa mga dayuhan na tumutulong sa kanila ay sina Ferdinand Blumentritt, kaibigan ni Rizal at si Miguel Morayta, isang politikong Español. Bagamat walang opisyal na pamunuan ang Kilusang Propaganda, maituturing na tatlo ang kinikilalang pinakatanyag na repormista o mga ulo ng Kilusang Propaganda ay sina Jose Rizal, Graciano Lopez Jaena, at Marcelo H. del Pilar.

Sa pamamagitan ng mga akda ng mga tanyag na repormista tulad nina Rizal, Lopez Jaena, at del Pilar ay napapaabot nila sa pamahalaang Español ang hangarin ng mga Pilipino. Upang mailathala ang kanilang saloobin at mga akda, itinatag ni Graciano Lopez Jaena ang La Solidaridad. Ang La Solidaridad ay opisyal na pahayagan ng Kilusang Propaganda. Ang mga paksang makabayan ang mga inilathala rito. Pinapadala ito sa Pilipinas upang mabasa ng mga Pilipino at magkakaroon ng kamalayan ang mga ito sa nagaganap sa Pilipinas at maunawaan ng mga Pilipino ang kahalagahan ng reporma sa bansa.

Ginamit ng mga propagandista ang lakas ng panulat sa pagsulong ng kanilang layunin. Inilathala ni Jose Rizal ang kaniyang mga nobelang *Noli Me Tangere* at *El Filibusterismo* na tumuligsa sa mga maling patakaran ng mga Español.

Itinatag naman ni Marcelo H. del Pilar ang *Diyaryong Tagalog*, ang unang pahayagang Tagalog. Dito niya unang ibinunyag ang kalupitan ng mga Español sa mga Pilipino. Ginamit ni del Pilar ang bansag na *Plaridel*. Nagalit ang mga Español sa kanya, kaya saglit siyang tumakas patungong Spain. Nang mamatay si Graciano Lopez Jaena noong 20 Enero 1896, si del Pilar ang pumalit bilang patnugot ng *La Solidaridad*.

Hindi maituturing na tagumpay ang Kilusang Propaganda sa kahilingan nitong pagbabago sa pamahalaan. Ngunit nagbigay daan naman ito sa pagbubuo ng isang lihim na kapisanang tinatawag na Katipunan.

Ang La Liga Filipina

Ang La Liga Filipina ay isang samahang binuo ni Jose Rizal noong 3 Hulyo 1892. Ang layunin nito ay ang mapagsamasama ang mga Pilipino sa buong kapuluan; maipagsanggalang sila sa mga mapang-abusong opisyal ng pamahalaan at sa katiwalian ng mga Español; proteksiyon sa bawat kasapi; paghihikayat sa edukasyon, agrikultura at komersyo; at pag-aaral at pagsagawa ng mga reporma sa bansa.

Marami ang sumali sa La Liga Filipina. Nahati ang mga kasapi, ang mga ilustradong kasapi ay nagtaguyod ng pakikipaglaban para sa reporma at ang iba ay nagbalak ng paghihimagsik.

Bagaman hindi nagtagal at natupad ang repormang ipinaglaban ng La Liga Filipina, nagising naman nito ang damdamin ng mga tao laban sa mga Español at nagbigay daan ito sa pagsiklab ng himagsikan ng 1896.


Ang Katipunan

Ang Katipunan o KKK (Kataas-taasan Kagalang-galangang Katipunan ng mga Anak ng Bayan) ay lihim na samahang naglayong wakasan ang pananakop ng mga Español sa pamamagitan ng puwersa o lakas. Itinatag ito nina Andres Bonifacio, Valentin Diaz, Teodoro Plata, Ladislao Diwa, at Deodato Arellano. Noong 7 Hulyo 1892 sa isang bahay sa 72 Kalye Azcarraga (Claro M. Recto na ngayon). Kasama ng ibang naging kasapi ay nagsanduguan sila. Ginamit nila ang sariling dugo sa pagsulat ng pananda ng kanilang mga pangalan. Si Andres Bonifacio ang tinaguriang Supremo ng Katipunan.

Naging inspirasyon ni Andres Bonifacio ang French Revolution 1789. Itinaguyod ng French Revolution ang konsepto ng kalayaan, pagkakapantay-pantay, at kapatiran (liberty, equality, at fraternity).

Si Emilio Jacinto ang tagapagpayo ni Andres Bonifacio, tinagurian din siyang Utak ng Katipunan. Siya rin ang patnugot ng pahayagan ng Katipunan, Ang Kalayaan, na naglalahad ng mga mapanghihimagsik na kaisipan ng kapisanan.

Ang Katipunan ay natuklasan bago pa man nakapaghandang mga kasapi nito para sa labanan. Ngunit para kay Andres Bonifacio, nakatakda na ang himagsikan. Iyon na ang hudayat upang makipaglaban sila sa mga Español.



Pagyamanin

Ngayon alam mo na ang epekto ng kaisipang liberal sa Pilipinas. Handa ka na bang pagyamanin ang kaalamang ito? Subukin mong sagutin ang sumusunod na gawain.

Panuto: Palitan ng letra ang bawat bilang sa loob ng kahon ayon sa pagkakasunod-sunod ng alpabetong Ingles upang mabuo ang mga pangalan.

1	2	3	4	5	6	7	8	9	10	11	12	13	14	15
A	B	C	D	E	F	G	H	I	J	K	L	M	N	O

16	17	18	19	20	21	22	23	24	25	26
P	Q	R	S	T	U	V	W	X	Y	Z

Halimbawa:

11	1	9	19	9	16	1	14	7
K	A	I	S	I	P	A	N	G

12	9	2	5	18	1	12
L	I	B	E	R	A	L

1. Anong samahan ang itinatag ni Dr. Jose Rizal noong 3 Hulyo 1892?

12	1

12	9	7	1

6	9	12	9	16	9	14	1

2. Anong samahan ang itinatag ng mga ilustrado na humihingi ng reporma sa pamahalaan?

11	9	12	21	19	1	14	7

16	18	15	16	1	7	1	14	4	1

3. Sino ang tagapagpayo ni Andres Bonifacio?

5	13	9	12	9	15		10	1	3	9	14	20	15

4. Anong samahan ang itinatag nina Andres Bonifacio noong 7 Hulyo 1892?

11	1	20	9	16	21	14	1	14

5. Anong rebolusyon noong 1789 ang nagbigay inspirasyon kay Andres Bonifacio?

6	18	5	14	3	8

18	5	22	15	12	21	20	9	15	14



Isaisip

1. Ano ang naging epekto ng kaisipang liberal sa Pilipinas?
2. Anong pamamaraan ang ginamit ng mga Kilusang Propaganda sa paghingi ng pagbabago?
3. Ano ang ginamit ng Katipunan sa pakikipaglaban sa mga Español?
4. Sino sino ang tinuturing na pinakatanyag na repormista o kinikilalang mga ulo ng kilusan?
5. Ano ang Kilusang Propaganda?



Isagawa

Punan ang tsart tungkol sa Kilusang Propaganda at Katipunan.

Mga Nagtatag ng Kilusang Propaganda	Pahayagan ng Propaganda	Mga Nagtatag ng Katipunan	Pahayagan ng Katipunan



Tayahin

Panuto: Basahin at suriing mabuti ang mga pangungusap at piliin ang tamang sagot na tinutukoy sa bawat pangungusap. Isulat sa sagutang-papel.

1. Sino ang unang patnugot ng La Solidaridad?
 - A. Emilio Jacinto
 - B. Graciano Lopez Jaena

2. Ano ang opisyal na pahayagan ng Katipunan?
 - A. Diyaryong Tagalog
 - B. Kalayaan
3. Kailan naitatag ang La Liga Filipina?
 - A. 3 Hulyo 1892
 - B. 7 Hulyo 1892
4. Ano ang tawag kay Andres Bonifacio bilang lider ng Katipunan?
 - A. Utak ng Katipunan
 - B. Supremo
5. Kailan itinatag nina Andres Bonifacio ang Katipunan?
 - A. 3 Hulyo 1892
 - B. 7 Hulyo 1892
6. Sinong Gobernador Heneral ang naghatol ng kamatayan sa tatlong paring martir?
 - A. Miguel Morayta
 - B. Rafael Izquierdo
7. Sino ang pumalit kay Graciano Lopez Jaena bilang patnugot ng La Solidaridad?
 - A. Jose Rizal
 - B. Marcelo H. del Pilar
8. Sino ang mga kasapi ng Katipunan?
 - A. Ladislao Diwa at Deodoro Plata
 - B. Juan Luna at Pedro A. Paterno
9. Sino ang tinaguriang Utak ng Katipunan?
 - A. Deodato Arellano
 - B. Emilio Jacinto
10. Anong samahan ang nais wakasan ang pananakop ng mga Español sa pamamagitan ng puwersa o lakas?
 - A. Kilusang Propaganda
 - B. Katipunan



Karagdagang Gawain

Panuto: Punan ang patlang. Kompletuhin ang pangungusap sa pamamagitan ng pagtukoy sa tamang salita. Isulat ang sagot sa sagutang-papel.

1. Ang La Solidaridad ang naging tagapagpahayag ng mithiin at kahilingan ng _____.
2. Kataas-taasan Kagalang-galangang _____ ng mga Anak ng Bayan ang lihim na samahan na itinatag nina Andres Bonifacio.
3. Sina Rizal, Lopez Jeana, at del Pilar ang kinikilang pangunahing _____.
4. Inilathala ni Jose Rizal ang kaniyang mga nobelang Noli Me Tangere at _____ na tumuligsa sa mga maling patakaran ng mga Español.
5. Ang La Liga Filipina ay isang samahang binuo ni _____ noong 3 Hulyo 1892.

Sanggunian

Alvenia P. Palu-ay. *Makabayan Kasaysayang Pilipino, Batayang Aklat sa Ikalimang Baitang* Quezon City: LG&M, 2006, 104-105.

Alvenia P. Palu-ay. *Makabayan Kasaysayang Pilipino, Batayang Aklat sa Ikalimang Baitang* Quezon City: LG&M, 2006, 109-112.

Estelita B. Capiña and Gloria P. Barrientos. *Pilipinas: Bansang Malaya, Batayang Aklat Heograpiya, Kasaysayan at Sibika* Quezon City: SD Publications, Inc., 2000, 96-99.

Estelita B. Capiña and Gloria P. Barrientos. *Pilipinas: Bansang Malaya, Batayang Aklat Heograpiya, Kasaysayan at Sibika* Quezon City: SD Publications, Inc., 2000, 100-101.

Florencia C. Domingo, Ph.D. et al. *Pilipinas: Isang Sulyap at Pagyakap, Batayang Aklat sa Araling Panlipunan 1* Makati City: EdCrisch International, Inc., 2006, 118-122.

Florencia C. Domingo, Ph.D. et al. *Pilipinas: Isang Sulyap at Pagyakap, Batayang Aklat sa Araling Panlipunan 1* Makati City: EdCrisch International, Inc., 2006, 127-142.

Jose Corazon de Jesus. Bayan Ko, Wikipedia, last modified June 22, 2020, https://en.wikipedia.org/wiki/Bayan_Ko.

Project EASE (Effective and Alternative Secondary Education). *Araling Panlipunan I, Modyul 13, Ang Paghahanda para sa Pagsasarili*, Department of Education, 2014.

Para sa mga katanungan o puna, sumulat o tumawag sa:

Department of Education - Bureau of Learning Resources (DepEd-BLR)

Ground Floor, Bonifacio Bldg., DepEd Complex
Meralco Avenue, Pasig City, Philippines 1600

Telefax: (632) 8634-1072; 8634-1054; 8631-4985

Email Address: blr.lrqad@deped.gov.ph * blr.lrpd@deped.gov.ph